

**Los ntawm Thawj Tswj
Hwm Dieter F. Uchtdorf**

Tus Pab Cuam thib Ob hauv
Thawj Pawg Thawj Tswj Hwm



Ib tug Thwaj Tim lub Neej

Peb caug xyoos dhau los nyob hauv Ghana, yog thawj zaug uas ib tug ntxhais kawm ntawv qib siab hu ua Doe nkag mus rau hauv ib lub tsev sib ntsib LDS. Ib tug phooj ywg twb caw Doe nrog nws mus, thiab Doe xav paub tias lub Koom Txoos no zoo li cas.

Cov neeg nyob ntawd twb ua siab dawb siab zoo rau nws ua rau nws xav paub seb hais tias, “Lub koom txoos no yog dab tsi?”

Ua rau Doe txais kev tshoov siab heev nws thiaj li txiav txim siab kawm ntawv txog lub Koom Txoos thiab cov neeg nyob hauv, cov neeg uas muaj kev xyiv fab heev. Tiam sis thaum nws pib kawm, nws tsev neeg thiab cov phooj ywg uas txhawj txog nws pib tawm tsam nws txhua lub sij hawm. Lawv hais tej yam phem phem txog lub Koom Txoos thiab ua txhua yam lawv ua tau kom nws tsis txhob koom lub Koom Txoos.

Tiam sis Doe twb muaj ib zaj lus tim khawv lawm.

Nws muaj kev ntseeg, thiab nws nyiam txoj moo zoo no, uas ua rau nws lub neej muaj kev xyiv fab. Yog li ntawd, nws thiaj li ua kev cai raus dej.

Tom qab ntawd, nws cia li kawm vaj lug kub thiab thov Vajtswv tas li. Nws yoo mov thiab nrhiav tus Vaj Ntsuj Plig Dawb Huv tej kev tshoov siab hauv nws lub neej. Yog li ntawd, Doe zaj lus tim khawv thiab txoj kev ntseeg loj tuaj thiab muaj zog tuaj. Ces nws txiav txim siab ua ib tug ntxhais txib rau tus Tswv.

Tom qab nws ua ntxhais txib lawm, nws tham thiab yuav ib tug tub txib uas tau rov qab los tsev lawm—yog tib tug uas tau muab nws ua kev cai raus dej ntau xyoo tas los—thiab nkawd ua kev sib khi nyob hauv lub Tuam Tsev Johannesburg South Africa.

Ntau xyoo twb dhau los lawm txij thaum Doe Kaku pib muaj kev xyiv fab los ntawm Yexus Khetos txoj moo zoo. Thaum lub sij hawm ntawd, tsis yog nws muaj lub neej zoo txhua lub sij hawm. Nws twb raug tej kev nyuaj siab thiab kev poob siab, tsis hais qhov uas nws xiam ob tug me nyuam—kev tu siab kawg los ntawm tej xwm txheej no tseem ua rau nws muaj kev nyuaj siab heev.

Tiam sis nws thiab nws tus txiv, Anthony, twb siv zog koom siab koom ntsws thiab koom ua ke nrog nkawd Leej Txiv Saum Ntuj Ceeb Tsheej, tus uas nkawd hlub kawg siab kawg ntsws.

Hnub no, 30 xyoo tom qab nws ua kev cai raus dej, tsis ntev tas los Muam Kaku twb rov qab los tom qab nws ua ib tug ntxhais txib ib zaug dua—lub sij hawm no nws tus txiv, uas yog qhov chaw tshaj tawm txoj moo zoo tus thawj tswj hwm nyob hauv Nigeria, nrog nws mus.

Cov uas paub Muam Kaku hais tias nws muaj ib yam dab tsi tshwj xeeb. Nws ci ntsa iab heev. Thaum yus siv sij hawm nrog nws ua rau yus yeej zoo siab dua li qub.

Nws zaj lus tim khawv yeej ruaj khov: Nws hais tias, “Kuv paub tus Cawm Seej saib kuv zoo li Nws tus ntxhais thiab phooj ywg (saib Mauxiyas 5:7; Ethaws 3:14). Thiab kuv kawm thiab siv zog ua Nws tus phooj ywg thiab—tsis yog los ntawm tej yam kuv hais xwb tiam sis kuj yog los ntawm tej yam kuv ua.”

Peb Yog cov Thwaj Tim

Muam Kaku zaj yeej zoo li lwmm tus zaj thiab. Nws xav paub qhov tseeb, nws twb them tus nqi kom tau txoj kev kaj ntawm sab ntsuj plig, nws qhia tias nws hlub Vajtswv

thiab nws cov neeg zej zog, thiab thaum nws ua neej nws raug tej yam uas nyuaj thiab kev tu siab.

Tiam sis txawm nws raug xwm txheej dab tsi, txawm nws tu siab npaum li cas los, nws tseem muaj kev ntseeg mus tom ntej. Thiab qhov tseem ceeb heev, nws tseem muaj kev xyiv fab. Nws nrhiav ib txoj kev kom tiv tau tej kev txom nyem ntawm lub neej no thiab muaj ib lub neej zoo txawm yog nws raug tej xwm txheej ntawd!

Nws zaj yeej zoo li nej thiab kuv zaj.

Peb lub neej yeej yog ib lub neej uas nyuaj thiab muaj kev sim siab.

Peb txhua tus muaj kev nyuaj siab, kev poob siab, kev tu siab.

Tej lub sij hawm ua rau peb ntshai thiab ntxhov siab heev.

Tiam sis cov uas ua neej zoo li ib tug thwj tim—cov uas rau siab ntseeg thiab muaj kev ntseeg mus tom ntej; cov uas tso siab rau Vajtswv thiab ua raws li Nws cov lus txib;¹ cov uas ua raws li txoj moo zoo txhua hnuv thiab txhua lub sij hawm; cov uas pab tib neeg nyob ib puag ncig lawv zoo li Khetos, ua ib qho zoo rau ib lub sij hawm—yog cov uas ua tej yam me me uas pab tau ntau kawg.

Cov uas ua siab zoo ntxiv, zam txim me ntsis ntxiv, thiab muaj kev siab hlub me ntsis ntxiv yog cov uas yuav txais tau kev siab hlub.² Cov uas pab neeg ntiaj teb kom lawv ua zoo dua, los ntawm lawv tej kev saib xyuas thiab txoj kev hlub, thiab cov uas siv zog ua neej kaj siab, txaus siab, thiab tau koob hmoov zoo li ib tug thwj tim ntawm Yexus Khetos yog cov uas yuav tau kev xyiv fab thaum kawg.

Cov no yuav paub tias “kev hlub los ntawm Vajtswv, uas tau nthuav kom dav rau txhua txhia qhov chaw nyob rau hauv noob neej tej siab tej ntsws . . . yog yam uas xav tau tshaj plaws txhua txhia yam huv tib si . . . thiab qhov kev zoo siab tshaj plaws rau tus ntsuj plig.”³

LUS CIM

1. Saib Mauxiyas 4:6.
2. Saib Mathais 5:7.
3. 1 Nifais 11:22–23.

QHIA LOS NTAWM TSAB XOY NO

Thawj Tswj Hwm Uchtdorf qhia peb tias txoj kev ua ib tug thwj tim yeej nyuaj heev tiam sis cov uas ua neej “kaj siab zoo li ib tug thwj tim ntawm Yexus Khetos yog cov uas yuav tau kev xyiv fab thaum kawg.” Zoo li Thawj Tswj Hwm Uchtdorf qhia ib zaj txog Doe kom qhia tias

Khetos ib tug thwj tim tiag tiag yuav nrhiav tau kev xyiv fab thiab kev kaj siab lug txawm nws raug kev sim siab hauv lub neej no, tej zaum koj yuav xav qhia ib zaj los ntawm koj lub neej uas qhia tias vim li cas koj tau xaiv coj raws li Khetos thiab Nws tau txhawb nqa koj li cas. Thaum tus Ntsuj Plig coj koj txoj hau kev, koj tej zaj txog koj tus kheej yeej txhawb nqa cov uas koj qhia.

COV HLUAS

Kev Xyiv Fab Ua Yexus Khetos Ib tug Thwj Tim

Koj puas tau muaj ib hnuv uas mus tsis zoo? Koj tau ua li cas kom rov qab zoo siab? Thawj Tswj Hwm Uchtdorf paub tias “peb txhua tus muaj kev nyuaj siab, kev poob siab, kev tu siab. Tej lub sij hawm ua rau peb ntshai thiab ntxhov siab heev.”

Nws txoj kev kho teeb meem yog kev ua neej zoo li “ib tug thwj tim lub neej”: “rau siab ntseeg thiab muaj kev ntseeg mus tom ntej.” Thaum peb muaj kev ntseeg mus tom ntej, peb tso siab rau Vajtswv, ua raws li Nws cov lus txib, thiab pab lwm tus—thiab muaj kev xyiv fab thaum peb ua tej ntawd! Zoo li Thawj Tswj Hwm Uchtdorf hais tias, “Cov uas ua neej zoo li ib tug thwj tim . . . yog cov uas ua tej yam me me uas pab tau ntau kawg.”

Cia li xav seb puas xav sau tej yam koj ua tau kom ua neej zoo li ib tug thwj tim. Piv txwv hais tias, tej zaum koj yuav sau tej yam uas koj pab tau lwm tus xws li “Pab niam thiab txiv npaj ua mov” los yog tawm tswv yim kom ua raws li cov lus txib xws li “Thov Vajtswv kom ua siab ntev rau kuv cov kwv tij cov muam.” Ces lwm zaus thaum koj ntxhov siab los yog npau taws, cia li saib tej yam koj sau, xaiv ib lub tswv yim, thiab sim ua li ntawd!

COV ME NYUAM

Sij Hawm Zoo Siab thiab Tu Siab

Tej hnuv ua rau yus tsis tshua zoo siab. Thiab yeej tsis ua li cas. Yexus pab tau koj nyiaj kom dhau.

Kos duab txog ib lub ntsej muag mlob. Yexus yuav pab koj li cas thaum koj tu siab? Nim no kos duab txog ib lub ntsej muag uas luag nyav. Yexus yauv pab kom koj zoo siab li cas?



Kev Ua Neej Fij Siab

Ua tib zoo thov Vajtswv kawm tej yam no thiab nrhiav kev tshoov siab seb koj yuav tsum qhia dab tsi. Qhov uas Vajtswv cov ntxhais to taub lub hom phiaj ntawm lub Koom Haum Niam Tsev yuav npaj lawv li cas kom txais tau cov koob hmoov ntawm txoj sia nyob mus ib txhis?

**Kev Ntseeg Tsev Neeg
Kev Pab**

Txwj Laug D. Todd Christofferson los ntawm Pawg Kaum Ob tug Thwj Tim hais tias, “Kev muab fij tseg txhais hais tias yus muab ib yam dab tsi tsa los yog fij tseg ua ib yam dawb ceev, uas siv kom ua tej yam dawb huv. Yuav vam meej hauv lub neej no tiag tiag thaum peb muab peb lub neej, uas yog peb txoj kev siv sij hawm thiab tej yam peb xaiv, fij tseg rau Vajtswv tej lub hom phiaj.”¹

Txwj Laug Neal A. Maxwell (1926–2004) los ntawm Pawg Kaum Ob tug Thwj Tim hais tias, “Peb pheej xav hais tias kev muab fij tseg yeej yog kev ywj peb tej khoom ntawm lub ntiaj teb no, thaum Vajtswv hais kom ua li ntawd xwb. Tiam sis kev muab fij tseg tiag tiag yog kev muab yus tus kheej rau Vajtswv.”²

Thaum peb muab peb tus kheej fij tseg rau Vajtswv tej lub hom phiaj, peb txoj kev ntseeg Yexus Khetos thiab Nws txoj Kev Theej Txhoy yuav loj tuaj. Thaum peb

muab peb lub neej fij tseg, tej yam peb ua li ntawd yuav ua rau peb hloov ua neeg dawb huv.

Carole M. Stephens, Pab Cuam thib ib nyob hauv lub Koom Haum Niam Tsev Pawg Thawj Tswj Hwm, hais tias: “Txwj Laug Robert D. Hales qhia tias, “Thaum peb khi thiab khaws peb tej lus khi, ces peb tso lub nitaj teb tseg thiab nkag mus rau hauv Vajtswv lub nceeg vaj lawm.”

“Peb tau pauv. Peb zoo txawv, thiab peb koj txawv lawm. Tej yam uas peb mloog thiab nyeem thiab hais yeej txawv thiab tej ris tsho uas peb hnay yuav txawv vim peb ua Vajtswv cov ntxhais thiab khi lus rau Nws lawm.”³

Kev muab fij tseg yog kev khi lus uas Vajtswv khi nrog “tsev neeg Ixayees li no: Kuv yuav ua kom lawv nco ntsoov kuv tej kev cai rau nruab siab. Kuv yuav ua lawv tus Vajtswv thiab lawv yuav ua kuv

haiv neeg” (Yelemis 31:33). Kev ua neej uas tau muab fij tseg rau Vajtswv yeej muaj raws li Vajtswv txoj hau kev rau peb.

Vaj Lug Kub Ntxiv

1 Thexalaunikes 1:3; Lus Qhuab Qhia thiab Kev Khi Lus 105:5; reliefsociety.lds.org

LUS CIM

1. D. Todd Christofferson, “Reflections on a Consecrated Life,” *Liahona*, Kaum Ib Hlis Ntuj 2010, 16.
2. Neal A. Maxwell, “Consecrate Thy Performance,” *Liahona*, Xya Hli Ntuj 2002, 39.
3. Carole M. Stephens, “Paub Peb tej Dej Num,” *Liahona*, Kaum Ib Hlis Ntuj 2012, 115–16.

Xav Txog Qhov No

Qhov uas peb muab peb lub neej fij tseg rau tus Tswv ua li cas pab peb hloov los ua zoo li Nws?